

■ DA LA VITA DA LUDMILLA CAHENZLI

L'emprima e la davosa petta per la scola

DA LUDMILLA CAHENZLI

S4 pettas fa ina buna mamma da trais uffants durant il temp da scola primara. Jau, Ludmilla Cahenzli, na sun betg ina buna mamma. Mia figlia pitschna ha finì l'emna passada la sisavla classa, ed jau hai fatg per l'emprima giada ina petta per en scola. Uss stun jau mal, ch'jau n'hai betg fatg dapliras. Pertge jau hai chattà or il tric.

Entaifer in onn da scola obtegnan ils geniturs invitaziuns tut che tschivla: L'invitaziun per la saira da geniturs, l'invitaziun per l'orientaziun davart l'instrucziun sexuala, l'invitaziun per l'orientaziun davart l'emprima communiun, l'invitaziun per vegnir a gidar al di da sport etc. Giudim ils cedels d'invitaziun hai in talun ch'è d'emplenir or e returnar a la scolasta. Cun il talun na fan ins betg palais sch'ins prenda part a l'occurrentza. Anzi, sin il talun stat scrit: «Tgenina mamma fiss pronta da far ina buna petta e purtar en scola?» La mamma po far ina crusch en in quadrel e segnalisar uschia ch'ella fetschia gugent ina petta. Insaoco m'ha questa crusch adina regurdà als Indians che suttascrive-

van pli baud cun cruschs. Ma il motiv principal ch'jau n'hai mai fatg ina crusch vegn da mes patratgar emancipatoric: «Las mammas han uss 2000 onns fatg pettas, uss èn ils babs vidlonder.» Quest patratgar vegn enfirmi d'ina marschadetgna profunda che correspunda a mes caracter natiral.

Mes uffants han adina batlegià ch'jau fetschia er ina petta. La figlia gronda ha schizunt ina giada bragi e ditg: «Tuttas mammas fan ina petta, mo ti betg.» «Sche tuttas mammas portan pettas en scola, hai soviso memia bleras», è stada mia resposta.

Avant trais emnas ha mia figlia pitschna purtà a chasa l'invitaziun per la finiziun da la sisavla classa. Ella ha be mess sin maisa-cuschina il cedel e gnanca dumandà sch'jau fetschia ina petta. Jau hai legì l'invitaziun, prendì il culli, fatg ina crusch, taglià or il talun e purtà el a mia figlia en chombra. «Quel sas dar a la scolasta.» «Ti fas ina petta?» ha ella dumandà e m'ha guardà cun in'egliada sceptica. «Cler.»

«Sas ti insumma far pettas?» Buna dumonda, hai jau pensà e respundi cun tun datschert: «Cler.» «Tge petta fas?» «Forsa ina da rieblas.»

Mia figlia ha mess il talun en il satgados e ditg nagut. Jau sun ida en cuschina a tscherugar il recept per la petta da rieblas. El n'era nagliur perpes. Probabel è'l giu en tschaler en la stgatla da bananas ch'jau n'hai betg pachetà or dapi che nus esan vegnids qua avant diesch onns. Tge far? Jau pudess gea simplamain cumprar ina petta tar il pasterner. Lez sto la finala era viver. Sche tuttas mammas fassessan sezzas las pettas, gress il pauper pasterner anc bancrut. Da l'autra vart vesì or coga mal, sch'jau vegn cun ina petta dal pasterner. Lezzas èn uschè perfectas e memia perfetga na dastga ina petta fatga sezza betg esser.

Suenter lungas ponderaziuns m'è vegnì endament ch'i dat «Backmischungen». Cun quellas vegn schizunt jau da far ina buna petta.

Jau sun pelegrinada en il Migros ed avant il regal da speza-

rias ed ingredienzas m'è ida sin ina glisch. «Schokoladencake», «Zitronencake», «Rüebli torte», «Tirolercake» etc. steva scrit sin ils pacs cun las maschaidas. Quai èn gea las pettas ch'jau hai mangià ils ultims onns a las sairadas da geniturs! Sch'jau avess savì da quai!

Jau hai cumprà in pac «Tirolercake» sco surpraisa per mia figlia e perquai ch'jau l'hai il pli gugent. A chasa durant che la petta è stada en furnel hai jau quintà or quantas pettas ch'jau avess pudì cuschinar, sch'jau avess adina fatg ina crusch sin il talun. Mia calculaziun: Durant in onn da scola datti en media trais taluns da petta per mintga scolar. Sch'ins ha trais uffants, fa quai nov pettas ad onn. Durant la scola primara – la fasa chauda da pettas, en scola secundara svaescha quest fenomen – fassess quai pia 54 pettas.

Cura ch'jau hai springì il zutger en pulvra sin il «Tirolercake», ch'era mo levet nair, hai jau deplorà d'avair fatg en tut quels onns mo ina solia crusch. Igl è gea uschè simpel da far pettas. Jau avess schizunt pudì schar far ellas mes Eugen.